

忿然鼓怒於人吏曰吾不必更語監司矣迎新從馬亦汝等為之終使人吏當之監司此令雖曰新例亦出於不得已也土豪等蔑視不從其頑悍之極非但不有邑宰又不有道主如此釋此不懲其漸將至於叛邑朝廷不可不別為治之請遣朝官推考痛治大抵土豪等侵虐官屬作為婢夫非但役使於一時使其子孫盡為私賤故官物日漸凋耗各官成風而原州宜寧尤其前者江原監司啓本原州官屬娶私賤子枝請並從父役者亦出於不得已而欲救其弊也右兩邑官屬子枝自今立法後姑為從父以救其弊何如傳曰原州宜寧等事如啓官屬從父役之事當與朝廷大臣議處之招政府郎官今於後日合坐收議○夜坤方乾方雷電坤方南方有氣如火○甲子傳曰宜寧土豪推考敬差官已今差送而更思之則使命似為煩多永川人推考敬差官安珪時在其道使安珪並推事下諭可也○領議政金謹思左議政金安老啓曰近來天變屢作臣等叨居燮理之地不可冒處故累為辭避而未蒙允許昨又雷電大作尤為恐懼臣等不可冒處重地敢辭答曰近者冬雷煩數豈無所召而然歟必是人所不知而天必先知之故屢示非常之變上下所當憂懼卿等有何所失而致災變乎勿辭再啓不見○夜